

# Kefahaman dan Kesedaran Tuntutan keatas Zakat Emas di Kalangan Wanita: Analisis dalam Komuniti Wanita di Dungun, Terengganu

Muhamad Anas Ibrahim<sup>1</sup>

Mohd Khairi Ismail<sup>5\*</sup>

Aemy Aziz<sup>2</sup>

Muhammad Saiful Islam Ismail<sup>3</sup>

Syaimak Ismail<sup>4</sup>

<sup>1</sup>Akademi Pengajian Islam Kontemporari, UiTM Cawangan Terengganu, Malaysia

<sup>2</sup>Akademi Pengajian Islam Kontemporari, UiTM Cawangan Sarawak, Malaysia

<sup>3</sup>Akademi Pengajian Islam Kontemporari, UiTM Cawangan Kedah, Malaysia

<sup>4</sup>Akademi Pengajian Islam Kontemporari, UiTM Cawangan Johor, Malaysia

<sup>5</sup>Fakulti Pengurusan dan Perniagaan, UiTM Cawangan Terengganu, Malaysia

\*Penulis Koresponden : khairiismail@uitm.edu.my

## Abstrak

*Sifat emas yang mempunyai nilai yang tinggi dan reka bentuk yang menarik membuatkan setiap wanita inginkannya untuk dijadikan perhiasan dan di pakai oleh mereka kemana-mana. Namun begitu, sifat emas sebagai barang bernilai ini telah meletaknya sebagai salah satu harta yang di kenakan zakat di dalam Islam. Zakat emas di kenakan kepada setiap pemiliknya di bawah kategori zakat harta. Hal ini demikian kerana sifat emas yang bernilai dan bersifat barang mewah itu menjadikannya sebagai salah satu kategori harta yang di kenakan zakat keatasnya. Zakat emas itu terlaksana sama ada emas yang di miliki tersebut di simpan atau emas itu di pakai sebagai perhiasan wanita apabila mencukui syarat yang telah di tetapkan. Zakat ini merupakan salah satu tuntutan kepada umat Islam yang berharta kerana zakat merupakan tuntutan dalam rukun Islam yang ketiga iaitu kita wajib mengeluarkan sebahagian harta yang bukan milik kita kepada golongan yang layak mendapatkannya. Kajian ini membincangkan kesedaran di kalangan wanita tentang tuntutan membayar zakat emas perhiasan yang telah di gunakan oleh mereka. Kajian menggunakan kaedah kuantitatif di mana satu tinjauan secara atas talian (online survey) telah dijalankan kepada 150 orang responden wanita yang terdapat di sekitar daerah Dungun, Terengganu. Hasil kajian menunjukkan majoriti atau 84.9% daripada responden mengetahui tentang kewajipan menunaikan zakat sekiranya telah cukup syarat yang*

ditetapkan. Justeru itu, usaha dalam meningkatkan kesedaran masyarakat tentang kewajipan menunaikan zakat termasuk ke atas emas perhiasan yang dimiliki haruslah sentiasa diteruskan.

**Kata kunci:** Kefahaman; Kesedaran; Zakat; Emas

## Pengenalan

Setiap yang berharta dan memiliki harta menjadi kewajipan kepadanya untuk mengeluarkan zakat apabila mencukupi tempoh haul dan nasab. Harta yang di miliki itu sebahagiannya merupakan hak orang lain yang perlu di keluarkan dan di bayar kepada mereka yang layak melalui badan zakat yang di iktiraf.

Rasulullah s.a.w bersabda;

**بُنِيَ الْإِسْلَامُ عَلَى خَمْسٍ: شَهَادَةٌ أَنْ لَا إِلَهَ إِلَّا اللَّهُ وَأَنَّ مُحَمَّدًا رَسُولُ اللَّهِ، وَإِقَامُ الصَّلَاةِ، وَإِيتَاءُ الزَّكَاةِ، وَالْحَجَّ، وَصَوْمُ رَمَضَانَ.**

“Islam itu dibina di atas lima tiang: Pertama bersaksi tiada tuhan yang disembah dengan sebenarnya melainkan Allah dan bersaksi Nabi Muhammad SAW pesuruh-Nya, Kedua mendirikan solat, Ketiga menunaikan zakat, Keempat mengerjakan haji dan yang terakhir berpuasa pada bulan Ramadan.” (*HR Bukhari No 8, Muslim No 16*).

Zakat sebagai Rukun Islam yang ketiga, merupakan satu kewajipan yang ditetapkan Allah kepada Ummat Islam sebagai satu amalan untuk menyucikan harta dan juga menyucikan hati dari sifat bakhil. Islam menggalakkan ummatnya berusaha dalam mencari dan mengumpulkan harta, dan pada masa yang sama, menggalakkan untuk berkongsi rezeki dengan orang di sekeliling melalui sedeqah atau zakat.<sup>1</sup>

Zakat berasal dari perkataan Arab "al-zakat" yang membawa maksud suci, rahmat, berkat, berkembang, subur, bertambah dan sedekah. Manakala dari segi istilah, zakat bermaksud penyerahan yang wajib dilakukan ke atas sebahagian harta kekayaan dari sumber yang baik yang dimiliki seseorang Muslim kepada golongan yang berhak menerimanya.<sup>2</sup> Zakat secara umum

<sup>1</sup> Rujuk Laman Web Rasmi [Https://Www.Zakatselangor.Com.My/Info-Zakat/Zakat-Kewajipan-Berzakat/Pengertian-Zakat/](https://Www.Zakatselangor.Com.My/Info-Zakat/Zakat-Kewajipan-Berzakat/Pengertian-Zakat/) Dan Wan Mohd Khairul Firdaus Wan Khairuldin, Mahadi Mohammad & Daud Ismai (2016) Pensyaratatan Had Kifayah Ibu Bapa atau Penjaga Pelajar di Bawah Asnaf Fakir Miskin: Satu Penilaian h-263, dalam Menelusuri Isu-isu Kontemporari Zakat, Pusat Pungutan Zakat (PPZ), Kuala Lumpur

<sup>2</sup> Hairunnizam Wahid, Mohd Ali Mohd Noor, Sanep Ahmad, Kesedaran Membayar Zakat: Apakah Faktor Penentunya?. International Journal Of Management Studies, [S.L.], V. 12, N. 2, P. 171-189, Dec. 2005. Issn 2180-2467 rujuk juga <https://muftiwp.gov.my/artikel/irsyad-fatwa/irsyad-fatwa-umum/1980-irsyad-fatwa-ke-38-adakah-dikenakan-zakat-perhiasan-wanita>

dapat dibahagikan kepada dua jenis, iaitu Zakat Fitrah dan Zakat Harta. Zakat fitrah wajib dibayar pada bulan Ramadhan dan merupakan zakat peribadi. Manakala, Zakat Harta pulak diwajibkan ke atas pemilikan harta yang telah mencapai kadar tertentu, mempunyai syarat tertentu dan akan dibahagikan kepada golongan-golongan tertentu<sup>3</sup>. Zakat harta boleh dibayar pada bila-bila masa dan merangkumi pelbagai kategori harta seperti pendapatan, wang simpanan, hasil perniagaan dan emas. Kajian ini pula akan memberi perhatian kepada zakat emas yang bersifat barang hiasan wanita.

## Objektif Kajian

Dalam perkembangan semasa, pembelian emas tidak dianggap suatu pembaziran sebaliknya satu pelaburan jangka panjang kerana jika terdesak barang itu boleh dijual balik terutamanya ketika harganya melonjak tinggi. Sifat emas yang kurang susut nilainya juga telah menjadi tarikan untuk para wanita membelinya. Oleh itu kajian ini akan membincangkan tentang kesedaran di kalangan wanita tentang tuntutan membayar zakat emas perhiasan yang telah digunakan oleh mereka.

## Kajian Literatur

Noraini Saro & Tutasting@Rawi Nordin (2017) dalam kertas kerja mereka yang bertajuk *Pengambilan hukum uruf dalam zakat emas perhiasan negeri-negeri di utara Malaysia*, telah membincangkan berkaitan konsep uruf dalam zakat emas. Menurut kajian mereka, uruf merupakan salah satu sumber hukum Islam yang diguna pakai sebagai penentuan kenaan zakat emas perhiasan di Malaysia. Uruf juga adalah sesuatu yang disenangi atau diguna pakai oleh masyarakat serta menjadi kebiasaan dalam kehidupan, samaada melalui kata-kata atau perbuatan. Konsep pengambilan uruf dalam pelaksanaan zakat emas perhiasan perlu diteliti dengan sebaiknya, supaya tidak ada kekeliruan dalam pelaksanaan hukum zakat emas perhiasan dikalangan masyarakat Islam di Malaysia terutamanya dikalangan golongan wanita Islam.<sup>4</sup> Seterusnya, kajian zakat emas oleh Nor Mohd Faisal Bin Md Ariffin membincangkan mengenai amalan uruf dalam penentuan zakat emas perhiasan yang hanya melibatkan kawasan Selangor dan Melaka sahaja<sup>1</sup>. Masih kurang kajian zakat emas dibuat di kawasan Pantai Timur, khususnya di Terengganu.

<sup>3</sup> Rujuk laman web rasmi <https://muftiwp.gov.my/artikel/irsyad-fatwa/edisi-ramadhan/1982-hukum-mengeluarkan-zakat>

<sup>4</sup> Noraini Saro, and Tutasting@Rawi Nordin, (2017) [Pengambilan hukum uruf dalam zakat emas perhiasan negeri-negeri di utara Malaysia / Noraini Saro and Tutasting@Rawi Nordin](#). In: 2nd International Islamic Heritage Conference (ISHEC 2017), 14-15 November 2017, Avillion Hotel Melaka.

## Konsep Emas Sebagai Penyimpan Nilai

Emas mula berkembang penggunaan sebagai salah satu komoditi wang pada abad ke 19. Pada awal perkembangan tamadun manusia, bahan-bahan logam telah digunakan sebagai wang antaranya tembaga, perak dan emas. Pada awalnya, penggunaan wang perak lebih banyak digunakan, tetapi setelah harga perak semakin merosot, mata wang dari emas menjadi antara yang utama digunakan.<sup>5</sup>

Antara kelebihan menggunakan emas sebagai komoditi wang ialah:

- a) Selain diterima oleh semua masyarakat, emas juga terkenal sebagai satu komoditi yang berfaedan dan boleh digunakan untuk pelbagai tujuan termasuk sebagai perhiasan.
- b) Emas mudah dibawa dan mempunyai nilai yang tinggi serta dikehendaki oleh pelbagai peringkat masyarakat.
- c) Emas dan perak mempunyai ketahanan fizikal yang tinggi dan tidak mudah berkarat seperti besi
- d) Emas dapat dikenalpasti keasliannya kerana mempunyai beberapa ciri keistimewaan yang sukar dipalsukan.<sup>6</sup>

Kewajipan memunaikan zakat emas ada disebut dalam firman Allah:

يَا أَيُّهَا الَّذِينَ آمَنُوا إِنَّ كَثِيرًا مِنَ الْأَحْبَارِ وَالرُّهْبَانِ لَيَأْكُلُونَ أَمْوَالَ النَّاسِ بِالْبَاطِلِ وَيَصُدُّونَ عَنْ سَبِيلِ اللَّهِ وَالَّذِينَ يَكْنِزُونَ {  
الْذَّهَبَ وَالْفِضَّةَ وَلَا يُنْفِقُونَهَا فِي سَبِيلِ اللَّهِ فَبَسِّرُهُمْ بِعِذَابٍ أَلِيمٍ (34)  
(وَجُنُوبُهُمْ وَظُهُورُهُمْ هَذَا مَا كَنَزْتُمْ لَنْفَسِكُمْ فَذُوقُوا مَا كُنْتُمْ تَكْنِزُونَ (35)}  
}

Maksudnya: "Hai orang-orang yang beriman, sesungguhnya sebagian besar dari orang-orang alim Yahudi dan rahib-rahib Nasrani benar-benar memakan harta orang dengan jalan yang batil, dan mereka menghalang-halangi (manusia) dari jalan Allah. Dan orang-orang yang menyimpan emas dan perak dan tidak menafkahkannya pada jalan Allah, maka beritahukanlah kepada mereka (bahwa mereka akan mendapat) siksa yang pedih; pada hari dipanaskan emas perak itu dalam neraka Jahanam, lalu dibakar dengannya dahi, lambung, dan punggung mereka, (lalu dikatakan) kepada mereka, Inilah harta benda kalian yang kalian simpan untuk diri kalian sendiri, maka rasakanlah sekarang (akibat dari) apa yang kalian simpan itu." (Surah At-Taubah, ayat 34-35)

<sup>5</sup> Nurjanah Ika, (2015) *Pandangan Yusuf al-Qardawi Tentang Zakat Perhiasan Emas dan Perak*. Undergraduate (S1) thesis, STAIN Ponorogo.

<sup>6</sup> Ibid, rujuk juga <https://muftiwp.gov.my/artikel/irsyad-fatwa/irsyad-fatwa-umum/1980-irsyad-fatwa-ke-38-adakah-dikenakan-zakat-perhiasan-wanita>

Emas merupakan satu ekuiti yang sentiasa berubah nilainya. Mengikut peredaran semasa dan kesedaran yang semakin meningkat, lebih ramai yang melihat emas sebagai satu lubuk harta selain menjadikan emas sebagai perhiasan diri. Kini ramai yang membeli emas untuk pelaburan masa depan, disimpan dan juga pada masa yang sama, masih tertarik menjadikan emas sebagai penaik seri seorang wanita.”

Emas yang dizakatkan boleh dikategorikan kepada dua iaitu;

i. Emas yang disimpan (tidak dipakai)

Emas dibawah kategori ini, disepakati bahawa sekiranya emas tersebut telah cukup nisab (batas minimum pemilikan) dan juga haul (tempoh pemilikan), wajib ke atas pemiliknya untuk menzakatkan emas tersebut. Nisab bagi zakat emas yang disepakati adalah sebanyak 20 Dinar atau 85 gram, dengan haul yang mencukupi iaitu setelah setahun pemilikan.<sup>7</sup>

Saidina Ali telah meriwayat bahawa Nabi Muhammad s.a.w telah bersabda: “....dan tidak diwajibkan mengeluarkan zakat (emas) kecuali kamu mempunyai 20 dinar (salah satu matawang zaman dahulu yang digunakan di negara Arab). Apabila kamu mempunyai 20 dinar dan telah cukup haulnya diwajibkan zakatnya setengah dinar. Demikian juga kadarnya jika nilainya bertambah dan tidak diwajibkan zakat bagi sesuatu harta kecuali genap setahun.” (Riwayat Sunan Abu Daud)

Diriwayatkan pula daripada Saidatina Aisyah;

“Aku mendengar Rasulullah bersabda, ‘Tidak ada zakat ke atas harta sehingga cukup haul (satu tahun) telah berlalu’” (HR Ibn Majah)

ii. Emas yang dipakai (emas perhiasan)

Hukum zakat ke atas emas perhiasan mempunyai beberapa pendapat dalam kalangan ulama'. Perkara ini turut disebut oleh Dr. Yusuf al-Qaradhawi di dalam Fatawa al-Mu'asirah (*Fatwa Masa Kini*): “Perkara yang telah sedia maklum, bahawa para fuqaha berselisih pendapat tentang kewajipan zakat terhadap perhiasan wanita jika ia terdiri daripada emas dan perak.

Menurut Dr. Yusuf al-Qaradhawi di dalam kitabnya *Fiqh al-Zakah* (Bahagian 3, Bab 3), setelah melihat pelbagai pandangan, beliau menyatakan pandangan yang kuat ialah zakat tidak wajib ke atas emas perhiasan wanita, namun dikecualikan (dikenakan zakat) jika termasuk di dalam salah satu kategori berikut;

- a) Perhiasan emas yang dimiliki bukan untuk dipakai tetapi untuk disimpan dijadikan aset simpanan, kerana emas tersebut telah beralih menjadi emas simpanan.

<sup>7</sup> Alfiani, Rani (2013) *Konversi Nishab zakat emas, perak dan pertanian menurut Sulaiman Rasjid*. Diploma thesis, UIN Sunan Gunung Djati Bandung.

- b) Emas perhiasan yang dimiliki adalah terlalu banyak dan melebihi kadar yang biasa dipakai oleh wanita setempat.

## Pengurusan Zakat Emas Perhiasan (Dipakai) Di Malaysia

Kadar nisab emas perhiasan tidak ada disebut di dalam al-quran maupun hadith. Bagi negeri-negeri di Malaysia, penentuan uruf dilakukan melalui kajian dan muzakarah Jawatankuasa Fatwa Negeri masing-masing. Cara pengiraan nilai zakat adalah seperti berikut;

$[(\text{Berat emas} - \text{Uruf}) \times \text{harga emas semasa} \times 2.5 \% \text{ kadar zakat}]$

Jadual 1: Kadar Uruf semasa setiap negeri di Malaysia

Negeri	Kadar uruf semasa	Agensi Zakat Negeri
Selangor	800 gram	Lembaga Zakat Selangor, MAIS
Wilayah Persekutuan	800 gram	Pusat Pungutan Zakat, MAIWP
Terengganu	850 gram	Majlis Agama Islam & Adat Melayu Terengganu
Johor	850 gram	Majlis Agama Islam Negeri Johor
Pulau Pinang	165 gram	Zakat Pulau Pinang
Kelantan	Tiada uruf	Majlis Agama Islam & Adat Istiadat Melayu Kelantan
Perlis	85 gram	Majlis Agama Islam & Adat Istiadat Melayu Perlis
Negeri Sembilan	200 gram	Perbadanan Baitulmal Negeri Sembilan
Kedah	85 gram	Lembaga Zakat Negeri Kedah Darul Aman
Melaka	200 gram	Zakat Melaka
Pahang	500 gram	Pusat Kutipan Zakat, Majlis Agama Islam & Adat Resam Melayu Pahang
Perak	500 gram	Majlis Agama Islam & Adat Melayu Perak
Sabah	152 gram	Bahagian Zakat dan Fitrah, Majlis Ugama Islam Sabah
Sarawak	90 gram	Tabung Baitulmal, Majlis Islam Sarawak

(Sumber: Nor & Md, 2015)

## Motodologi Kajian


Populasi kajian ini adalah penduduk wanita yang tinggal di daerah Dungun, Terengganu. Kajian ini menggunakan kaedah penempelan bertujuan yang berbentuk kajian kuantitatif di mana satu tinjauan secara atas talian (*online survey*) telah dijalankan kepada 150 orang responden wanita yang terdapat di sekitar daerah Dungun, Terengganu. Pembentukkan soal selidik berdasarkan

kajian-kajian lepas iaitu daripada Noraini Saro & Tutasting@Rawi Nordin (2017). Soalan-soalan yang ditanya adalah untuk mengetahui samada masyarakat sedar akan keperluan menunaikan zakat emas yang dipakai serta kesudian mereka untuk mengeuarkan zakat sekiranya pemilikan emas mereka telah mencapai haul dan nisbah. Selain itu, soalan survei juga ingin melihat berapa ramai yang berminat untuk terlibat dalam kajian berkaitan emas serta tahap kesedaran mengikut julat umur.

## Hasil Kajian

Seramai 150 responden telah menyertai tinjauan yang telah dijalankan. Julat umur terbesar yang menyertai tinjauan ini adalah antara 26-35 tahun (Rajah 1). Daripada tinjauan survei dalam kalangan terdekat, mereka yang di dalam julat umur ini semakin menunjukkan pemilikan kepada emas perhiasan dan mempunyai kuasa beli yang tinggi. Di bawah adalah pecahan julat umur yang terlibat sebagai responden;


Rajah 1 Minat kepada emas perhiasan mengikut umur



Sumber: Survei (2020)

Hasil daripada tinjauan yang dibuat majoriti atau 84.9% daripada responden mengetahui tentang kewajipan menunaikan zakat sekiranya telah cukup syarat yang ditetapkan (Rajah 2). Terdapat responden menyatakan bahawa mereka tidak mengetahui keperluan untuk membayar zakat emas penghiasan dan ini menunjukkan suatu keadaan yang tidak baik dan perlu diperhalusi dari segi faktor yang membawa kepada berlakunya kepada perkara sebegini. Selain itu terdapat responden iaitu 7.6% menyatakan bahawa mereka tidak pasti keperluan untuk membayar zakat untuk barang perhiasan. Hal ini timbul kerana kekeliruan dari segi jenis emas perhiasan dan nilai yang menyebabkan wujud keperluan untuk membayar zakat. (Rajah 2).


Rajah 2 Pengetahuan terhadap keperluan membayar zakat untuk emas perhiasan



Sumber: Survei (2020)

Selain itu, 52.8% responden yang menjawab mengetahui kadar uruf yang ditetapkan keatas zakat emas perhiasan (Rajah 3). Selain itu terdapat responden menyatakan mereka tidak mengetahui dan tidak pasti kadar uruf yang ditetapkan keatas zakat emas perhiasan iaitu masing-masing 7.60% dan 7.50%. Namun begitu peratusan responden yang sedikit ini tidak dapat mewakili keseluruhan masyarakat tentang kefahaman dan makluman berkaitan zakat emas perhiasan ini, tapi ia dapat menjadi satu petanda bahawa kebanyakan mereka yang berumur 20 tahun ke atas menyedari akan kewajipan menunaikan emas perhiasan, bukan hanya semata-mata berminat untuk memiliki emas sebagai perhiasan sahaja. Cuma jika dilihat dari statistik ini, kebanyakannya responden mengetahui dengan tepat berapakah jumlah emas yang disyaratkan untuk ditunaikan zakat ke atasnya. Namun begitu satu perkembangan yang amat baik apabila melihat maklum balas responden yang menyatakan kesediaan para wanita terutamanya untuk menunaikan zakat ke atas emas sekiranya telah cukup syarat. 100% responden bersedia untuk membayar zakat sekiranya telah didapati telah cukup nisab dan haulnya.

Rajah 3 Pengetahuan kadar pembayaran zakat perhisan



Sumber: Survei (2020)

## Perbincangan Dan Rumusan

Amalan berzakat boleh memupuk sifat pemurah dan rasa empati. Amalan itu juga boleh membuang sifat kedekut dan unsur-unsur bakhil. Hakikat ini dapat dirasai oleh pengeluar zakat dan dia juga menyedari bahawa zakat itu lebih ketara kepada penambahan harta daripada menguranginya. Hal ini sebagaimana yang ditegaskan oleh Rasulullah SAW dengan sabdanya:

مَا نَفَصَتْ صَدَقَةٌ مِنْ مَالٍ

Maksudnya: "Zakat itu tidak mengurangi harta." Riwayat Muslim (2588)  
Allah Subhanahu Wata'ala berfirman dalam surah Al-Baqarah ayat 269:

يُؤْتِي الْحِكْمَةَ مَنْ يَشَاءُ وَمَنْ يُؤْتَ الْحِكْمَةَ فَقَدْ أُوتِيَ خَيْرًا كَثِيرًا وَمَا يَذَّكَرُ إِلَّا أُولُوا الْأَلْبَابِ

"Dia (Allah) memberikan hikmah kepada sesiapa yang dikehendakinya, dan sesiapa yang diberikan hikmah itu, maka sesungguhnya dia telah diberikan kebijakan yang banyak. Dan

---

*tiadalah yang dapat mengambil pengajaran melainkan orang-orang yang mempunyai akal yang dapat memikir dan memahaminya.”*

Usaha dalam meningkatkan kesedaran masyarakat tentang kewajipan menunaikan zakat termasuk ke atas emas perhiasan yang dimiliki haruslah sentiasa diteruskan. Minat masyarakat terutama dari kaum wanita kini semakin meningkat terhadap emas, bukan sahaja untuk perhiasan, tetapi juga untuk pelaburan jangka masa panjang. Ilmu berkaitan pemilikan emas perlu sentiasa disebarluaskan dan dipastikan sahih maklumatnya terutama oleh mereka yang mempunyai ilmu dan kepakaran dalam bidang ini. Kajian ini telah membincangkan sama ada kesedaran itu wujud atau tidak dalam kalangan masyarakat terdekat. Semoga dengan penyebaran ilmu yang benar berkaitan emas ini dapat menjadikan masyarakat lebih cakna dan berhati-hati dalam menguruskan harta.

## Rujukan

- Alfiani, Rani (2013) Konversi Nishab zakat emas, perak dan pertanian menurut Sulaiman Rasjid. Diploma thesis, UIN Sunan Gunung Djati Bandung.
- Hairunnizam Wahid, Mohd Ali Mohd Noor & Sanep Ahmad. Kesedaran Membayar Zakat: Apakah Faktor Penentunya? International Journal of Management Studies, [S.L.], V. 12, N. 2, P. 171-189, Dec. 2005. Issn 2180-2467.
- Maffuza Salleh & Zaini Yusnita Mat Jusoh (2014) Pemahaman Wanita Islam Terhadap Zakat Emas Perhiasan Di Bandar Seri Putra, Kajang: Satu Tinjauan Awal, Jurnal Pengajian Islam, Akademi Islam Kuis, Bil 7, Isu 1:2014,
- Muaz Bin Omar (2016) Konsep Zakat Dan Peranannya Terhadap Masyarakat Sejagat, Muzakarah Fiqh & International Fiqh Conference 2016 22 & 23 November 2016
- Nor Mohd Faisal, Md Ariffin (2015) Penentuan ‘Urf zakat emas perhiasan: Analisis perbandingan Majlis Agama Islam Selangor dan Pusat Zakat Melaka / Nor Mohd Faisal Bin Md Ariffin. Masters thesis, University of Malaya.
- Nor Muhammad Bin Faisal Md Arifin,. Perbedaan Pemakaian Urf Zakat Emas Perhiasan (Kajian di Selangor dan Malaka). Al-Risalah, [S.I.], v. 14, n. 01, p. 132-160, dec. 2018. ISSN 2540-9522.
- Noraini Saro, and Tutasting@Rawi Nordin, (2017) Pengambilan hukum uruf dalam zakat emas perhiasan negeri-negeri di utara Malaysia / Noraini Saro and Tutasting@Rawi Nordin. In: 2nd International Islamic Heritage Conference (ISHEC 2017), 14-15 November 2017, Avillion Hotel Melaka.
- Nurjanah Ika, (2015) Pandangan Yusuf al-Qardawi Tentang Zakat Perhiasan Emas dan Perak. Undergraduate (S1) thesis, STAIN Ponorogo.
- Ummi Farahin Yasin, Noor Naemah Abdul Rahman, Mohd Faez Mohd Shah (2017). Pengambilkiraan Realiti Semasa Dalam Berfatwa: Analisis Terhadap Fatwa Zakat Di Selangor. Jurnal Fiqh, [S.L.], V. 10, P. 91-118. Issn 2289-7518.

---

Wan Mohd Khairul Firdaus Wan Khairuldin, Mahadi Mohammad & Daud Ismai (2016) Pensyaratian Had Kifayah Ibu Bapa atau Penjaga Pelajar di Bawah Asnaf Fakir Miskin: Satu Penilaian h-263, dalam Menelusuri Isu-isu Kontemporari Zakat, Pusat Pungutan Zakat (PPZ), Kuala Lumpur